

Die Leit vernarre

Doneilich sin ich mitm blooe Pfeil Schnellzug uf Ilia (zwischen Lugosch un Deva) gfahr un han mich gfreit, dass ich kummod aus dem Zug aussteije han kenne, ohne Hupser oder Ängschter, dass ich die Erd nit uner die Fiess krien. Die Zeit is schnell vergang mit Verzähle, weil dorte wohne unser Verwandti, vun meim Mann aus. Geger Owet han mer uns beizeite uf de Wech zruck an de Bahnhof gemacht, han Karte gelest un uns intressiert, uf wellem Gleis de Zug inlaafe werd. Mer hat uns freindlich Auskunft gin, dass der ufm Gleis zwaa intrefe werd. Sicherheitshalwer han mer ach noch uf die Tabell mit de Ankunfts- un Abfahrtszeite gschaut un uns beruhicht hinghuckt un die Welt for e Bassgei anschaut.

Ufmol kindicht e freindlich Weibsstimm ausm Lautsprecher die Ankunft vun eem Zug aus Lugosch geger Simeria uf Gleis zwaa an. Mir schau uf die Uhr, for unser Zug war noch finf Minute Zeit un mir denke, na der anre werd jo abfare un unsre intrefe. Dem war nit so. Gleich dernoh is noch e Zug aus der anri Richtung uf Gleis drei ingeloff. Mir stehn uf un wisse nit, was jetz gschiehe soll. Un schun saat die Stimm ausm Lautsprecher an, dass unser Pfeilzug uf Gleis vier intrefe werd. Mir ware perplex, was jetz mache? Dorch zwaa Zieg krawwle? Wann die awer grad dann anfare? Des is gefährlich. Ke Menschessel war zu gsiehn, wu mer hätte frooe kenne. Demoment ruckt de Zug ufm Gleis zwaa an un fahrt ab. Awer jetzer, saat mei Mann. Krawwl Weib, heirupp nuf mit dir. Oder mir bleiwe do. Er schiebt mich am Hinnre, ich steib un sin mit Mieh un Not nufkumm. Jetz, oh Schreck. E Pfiff vun Gleis vier, unser Zug setzt sich in Bewegung. Mir fuchtle wie wild aus dem anre Zug un zum Glick hat de Zugmechaniker des bemerkt un is wieder stehn geblieb. Ja, nor ich war noch nit une. Hups doch endlich, schreit mei Mann. Doch han ich mich des nit getraut, han mich nuner uf die Knie geloss un sin mit Ach un Krach nuner kumm. Mied un matt han mer uns endlich im richtiche Zug hinfaller gelosst.

Mitm Schaaml ausgerischt

Un weil ich eich grad vorher verzählt han, wie es mer mit dem Zug in Ilia ergang is, do is mer ingfall, wie des in de 70er Johre uf de Derfer war, wann unser Schwowe mitm Zug in die Stadt gfahr sin. Ja sicher, des ware ganz anri Zeite, inzwische sin 40 Jahr vergang. Doch manchmol denkt mer, dass die Zeit dorte, in selle Johre, stehn geblieb is. Sie sin meischt mitm Friezug gfahr, weil se selten gfahr sin, unser Schwowe, han se dann immer vill erlediche wille in der Stadt. Un es hat jo ke Bahnsteig gin, nit selmols un a nit heitzutach, in dem Bogarosch. Die Trappe ware hoch am Zug un ältre Leit is des schwar gfall, nuf zu krawwle. Meischt de Weiwer. Un ich erinnere mich, wann mei Eltre in die Stadt gfahr sin, do hat mei Vater es Schaaml bis zum Bahnhof nohgetraa. Wann de Zug ingeloff is, hat er des vor die Trappe gstellt, mei Mutter is nufgekrawwelt un dernoh war schun unser Nochber, de Vetter Niklos der wu Bahnhofsvorsteher war, zur Seit, hat des Schaaml wegger gezoo un in seim Heisl ufbewahrt, bis am Owet, wann mei Leit zruckkumm sin. Do hat mei Vater schun vun eem Finschter rausgeguckst un geruft: „Niklos, do sin mer! Her mitm Schaaml, dass es Mari aussteije kann!“

Ja gelt, so eenfach war des selmols. De Schwob hat sich in alli Situazione zu helfe gewisst!)